



CENTRALE BANK VAN ARUBA

A hisa e reserva obligatorio cu 2 punto di porciento entrante 1 di juni 2022

Persbericht

Conforme e tarea di e Comité di Maneho Monetario (CMM) pa evalua, determina y provece transparencia riba e maneho monetario di Banco Central di Aruba (BCA), BCA ta comunica lo siguiente. Durante e reunion di 24 di mei 2022, e CMM a dicidi pa hisa e reserva obligatorio di 20,0 porciento pa 22,0 porciento entrante 1 di juni 2022. Di e manera aki, e banconan comercial mester tene un balansa minimal na BCA, cu ta igual na 22,0 porciento di e depositonan riba termino cortico di nan clientenan. E decision aki ta basa primordialmente riba e nivel halto persistente di likides excesivo na e banconan comercial, como tambe riba un subida den e tasa di inflacion.

CMM a considera e siguiente informacion y analisis pa yega na su decision:

Reservanan internacional

Reservanan internacional, cu ta consisti di reservanan oficial di BCA y reservanan di divisa teni pa banconan comercial, a subi cu Afl. 398.9 miyon (Grafico 1) riba 29 di april 2022, compara cu fin di december 2021. Di mesun manera, e subcomponente reservanan oficial a crece cu Afl. 319,7 miyon durante e mesun periodo, mientras esunnan teni pa banconan comercial a subi cu Afl. 79.2 miyon. Consecuentemente, riba 29 di april 2022, e reservanan oficial y internacional a suma Afl. 3.064,6 miyon y Afl. 3.528,5 miyon, respectivamente. Pa e resto di 2022, ta premira subidanan den reservanan oficial y internacional debi na mas entradanan di divisa relata na turismo, fiansanan di exterior, y inversion procedente di exterior. Reservanan internacional ta anticipa di keda riba e cantidad minimo di 3 luna rekeri di pagonan riba e cuenta coriente (cual ta consisti di pago pa importacion, pago na inversionistanan, y transferencianan pa exterior manera placa manda afo door di migrantenan). Ta pronostica cu e reservanan oficial tambe lo permanece dentro di e margen acceptabel basa riba e metrico 'Assesing Reserve Adequacy' di e Fondo Monetario Internacional (FMI) (Tabel 1). E metrico FMI ARA ta basa riba un averahe di placa den circulacion, fiansa entre companianan liga na otro, debe externo, y exportacion di bienes y servicio.




Grafico 1 – Desaroyo den reservanan oficial y internacional.

Tabel 1: Metriconan relata na reservanan observa den 2022

	jan	feb	mrt	apr
Cobertura di pagonan riba cuenta coriente ¹	8,7	8,7	9,3	10,2
Metriko di IMF ARA ²	107,6	107,0	111,6	124,2

¹ E cantidad di luna di pagonan riba cuenta coriente cu e reservanan internacional ta cubri.

² E proporción entre e nivel di reservanan oficial y e nivel mínimo adecua (conforme IMF), den por ciento.

Inflacion

Na maart 2022, e Índice di Prijs di Consumo (IPC) tabata 4,0 por ciento mas halto compara cu e mesun luna di e aña anterior (Grafico 2). E aumento aki tabata causa primordialmente door di e aumento den prijs di gasoline, cu a afecta e componente di ‘transporte’ (contribuyendo cu 1,8 punto di porcentahe). Ademas, otro componentenan a contribui na e inflacion, esta ‘cuminda y bebida no alcoholico’ (contribuyendo cu 0,8 punto di porcentahe), ‘pañá y sapato’ (contribuyendo cu 0,4 punto di porcentahe), ‘recreacion y cultura’ (contribuyendo cu 0,3 punto di porcentahe) y ‘vivienda’ (contribuyendo cu 0,3 punto di porcentahe). Na final di maart 2022, e inflacion midi riba promedio di 12 luna a subi te na 2,1 por ciento y ta premira pa sigui crece den 2022. E expectativa aki ta basa riba e aumento persistente di prijsnan en particular na Estados Unidos y Europa, cual entre otro ta causa pa (1) e aumento den prijs di crudo, (2) e problemanan continuo den produccion y cadena di suministro, y (3) demanda cu ta persistentemente

mas halto. Mientrastanto na maart 2022, inflacion basico (excluyendo e componentenan cuminda y energia) a yega 2.1 por ciento si midi e final di respectivo luna contra e luna di e aña anterior, anto basa riba un promedio anual, esaki a yega na 0.6 por ciento.

Grafico 2. Inflacion basa riba indice di prijs di consumo
(Fuente: CBS, april 2022)




Grafico 2: Desaroyo inflacionario

Likides excesivo na banconan comercial

E total di likides excesivo na e banconan comercial a baha di Afl. 1.320,5 miyon na december 2021 na Afl. 1.208,0 miyon na maart 2022 (Grafico 3). E caida aki den likides excesivo ta debi primordialmente na e subida consecutivo den e reserva obligatorio door di BCA durante e prome tres lunanan di 2022. No obstante, e nivel di likides excesivo a keda significativamente mas halto cu e nivelnan midi prome cu e pandemia. Esaki tabata a causa di e demanda abou pa credito, ademas di e nivel eleva di fondonan di likides (cu ta inclui cash, bononan di gobierno y otro activo likido) na banconan comercial.

Grafico 3: Likides excesivo di banconan comercial
(Fuente: CBA)




Grafico 3: Desaroyo den likides excesivo

Desaroyo den credito

Durante maart 2022, credito total di e banconan comercial a mengua cu Afl. 41,2 miyon (of 1,1 porciento) te na Afl. 3.783,7 miyon, compara cu december di 2021. E caida aki tabata debi principalmente na e categoria ‘credito na empresa’ (Afl. 22,7 miyon). E componentenan ‘otro’ y ‘fiansa na individualnan’ a pone presion adicional riba menos demanda pa credito durante e periodo concerni, considerando nan caida cu respectivamente Afl. 10,4 miyon y Afl. 8,0 miyon. Pa e resto di 2022, ta premira cu credito bancario total lo keda flat. Manera previamente indica, e caida den demanda pa credito tambe ta contribui na un nivel halto di likides excesivo, dunando motibo pa hisa e reserva obligatorio.

Desaroyo den deposito di banconan comercial

Na maart 2022, e total di depositonan (excluyendo depositonan interbancario y depositonan di Gobierno di Aruba) a yega un nivel eleva di Afl. 5.118,2 miyon, compara cu Afl. 5.079,0 miyon registra na december 2021. Depositonan a expande debi cu depositonan riba cuenta corriente (Afl. 135,7 miyon) y cuentanan di spaar (Afl. 12,8 miyon) a aumenta. Sinembargo, un contraccion den depositonan riba termino fijo (Afl. 109,3 miyon) parcialmente a mitiga e aumento aki.

Centrale Bank van Aruba

9 augustus 2022